


PARAGVAY ET TVCVMAN.

clesiæ Cathedralis, quam Episcopatum *de la Plata* vocant, suffraganeum Archiepiscopatus *de los Reyes*. Indos tributarios habet 400000, quorum numerus indies accrescit. Civitas *Buenos Ayres* ostio fluminis proxima est in ripa ejus australi, solo ubere, & fructuum omnium Castellanos feraci. Colonos in eam deduxit Petrus de Mendoza anno 1535. Regio omnis plana est, exceptis collibus hinc illic, montiumque jugis, quæ ad littus excurrunt. *Santa Fe*, ad australe latus urbis *Assumcion*, conspicitur, plano solo, contermino provinciæ *Tucuman*, & urbi *Cardova*. Gentes barbaræ vicinæ sunt *Calchinos*, *Mepenes*, & *Chiloacas*. A *Buenos Ayres* 120 miliaribus recedit, & pari fere intervallo ab urbe *Assumcion*.

Circa littora istarum provinciarum, quæ à *Brasilia* ad fluvium usque *de la Plata* expanduntur, quinque aut sex occurrunt portus, com-

modi satis ad navium stationes, nempe portus *S. Vincentii* altit. grad. 33. & ulterius fluvius *Vbay*: necnon portus *de la Canavea* altitud. grad. 35: portus insuper *de la Barca*, fluvius & portus *S. Francisci*: Insula *S. Catalina*, ubi fida navibus quies: portus *Cerrado*, portus *Riopoblado*: fluvius *Tiraqueri*, grad. 32. Quo tempore dux Salazarius mortuo Petro de Mendoza, provinciis hinc imperitabat, anno 1545, accidit forte, ut de nocte irruens in ædes tigris cubantem in lecto Castellanus, spectante juxta uxore, graviter læserit, moxque avectum inde in arundineta, necatumque devoraverit: summo autem mane egressus dux Salazarius, militibus quinquaginta stipatus, feram quæsiturus, in diripienda eam præda occupatam deprehendit, cumque hæc contra ipsum insurgeret & jam ictum vibraret, dux exploso sclopeto, vulneratoque corde, eam interfecit.

PROVINCIA TVCVMAN.



Provincia & Præfectura *Tucuman* in mediterraneis sita est, extenditurque ejus districtus à provincia *de los Chicas*, qui jurisdictioni urbis imperialis *Potosi* subsunt, ad fluvium usque *de la Plata*.

Regio temperata est, sic satis fecunda, at auri & argenti fodinarum, quod quidem constet, in hunc usque diem expers. Loca, habitationesque Castellanos sub uno Episcopatu hæ sunt: nempe civitas *Sant Iago del Estero*, quam primum *del Varco* appellarunt, altit. grad. 28. à *Potosi* meridiem versus 85 leucis, ad lacum fluviumque *R. Estero*. Sedes est gubernatoris, ministrorum regionum, ac ærarii regii, nec non Episcopatus & cathedralis ecclesiæ. Urbs *Santa Maria de Talavera* 45 à *Sant Iago* versus boream leucis diffidet, à *Potosi* 40, altitud. grad. 26. Urbs *S. Michaëlis de Tucuman* 28 à *S. Iago* ab it leucis versus occidentem, altitud. grad. 27. Colonos accepit, quo tempore pater *Garcia de Mendoza*, Marchio *de Caniete* vice-regis titulo imperabat. Sunt etiam hic alia loca nova, *Londres* & *Chalcaque*, quam novam *Corduram* vocabant, in provincia *de los Iurias* &

Draguitas, quorum incolæ paucis retro annis alio translati sunt. Indigenæ hujus tractus laneas vestes gerunt, & interjecto corio affabre elaboratas, ad instar tapetorum Hispaniensium. Magnam alit pecorum frequentiam, propter lanæ usum, qui ipsis quæstus est uberrimus. Habitacula sua arte conjungunt, nec sparsim, sed vicatim habitant, quanquam minores sint pagi, nec usque adeo frequentes. Cum vero singulis singulæ fere familiæ contineantur, rubis, vepretisque cinguntur, propter perpetua, quibus inter se committuntur bella & similitates. Gens est laboribus assueta, nec ebrietati, uti aliæ Indorum nationes, dedita.

Septem flumina, eaque majora, provinciam istam irrigant, & torrentes plusquam 80, ab aquarum bonitate laudati. Pascua insigni hic amœnitate nitent, eaque magnitudine vasta. Eadem hic, quæ Castellæ, est æstatis hyemisque tempestas. Climate jacet salubri & temperato. Primi eam ingressi sunt militum duces, *Diego de Rojas*, *Philippus Gutierrez*, & *Nicolaus de Heredia*, qui eam detexere ad australe latus fluminis *de la Plata*, ad usque propugnaculum *Gaboto*.

Urbes.

Incolæ.

Flumina.